

BOSNA I HERCEGOVINA  
FEDERACIJA BOSNE I HERCEGOVINE  
TUZLANSKI KANTON  
OPĆINA ŽIVINICE  
OPĆINSKI NAČELNIK

Broj: \_\_\_\_\_  
Živinice, 24.05.2011. godine

## **I Z V J E Š T A J**

**O RADU OPĆINSKOG NAČELNIKA ZA 2010.GODINU**

**Živinice, maj 2011.godine**

## **I UVOD**

Na osnovu člana 15. stav 1. alineja 10. Zakona o principima lokalne samouprave u Federaciji BiH ("Sl.novine FBiH", br.49/06) i člana 59. Statuta općine Živinice – prečišćeni tekst ("Službeni glasnik općine Živinice" broj: 4/01), općinskom vijeću Živinice podnosim Izvještaj o radu za 2010. godinu. Temelj za izradu ovog izvještaja bio je Program rada općinskog Načelnika za 2010. godinu, srednjoročna vizija razvoja općine Živinice 2009-2012. godinu, godišnji izvještaji o radu općinskih službi za upravu i budžet za 2010.godinu.

Takođe su za izradu jednog sveobuhvatnog i sadržajnog izvještaja značajna i ostala planska dokumenta koje općina ima ili ih donosi za kraći ili duži period.U programiranju i planiranju općinskog razvoja i njihovom izvještajnom praćenju sve više se u obzir uzimaju principi održivosti i socijalne uključenosti. Ekonomski napredak i uključenost zajednice a posebno marginaliziranih i osjetljivih grupa građana moraju biti naša stalna brig.Pokazatelji koje imamo u zadovoljavanju ovih principa uvijek mogu biti bolji. Zato smo u ovom izvještaju nastojali da istaknemo pokazatelje koji daju realnu sliku stanja Općine Živinice na kraju 2010.godine.

Svakako da je navedeno stanje rezultat aktivnog procesa kreiranog od strane Općinskog Načelnika i Općinskog Vijeća kao partnera najodgovornijih za razvoj općine u svim oblastima života i rada.

Sumiranje godišnjih rezultata, što u suštini ovaj izvještaj predstavlja, takođe je proizvod rada svih subjekata iz javnog, privatnog i nevladinog sektora.

Vizija razvoja općine, kao zamišljena slika stanja općine na kraju perioda od nekoliko godina, osnova je za mjerenje uspjeha i dostignuća u razvoju naše lokalne zajednice. Realizacijom postavljenih razvojnih ciljeva, kao kontrolnih tačaka, koje nam pokazuju da li smo i kako nešto uradili i kakve rezultate ostvarili. u stvarnosti predstavlja korake na putu ka dostizanju definisane vizije razvoja:

***Općina Živinice će biti perspektivna, lijepa i čista, poželjna za život svih građana, bez obzira na vjersku, nacionalnu, socijalnu i drugu pripadnost, u kojoj će naša djeca poželjeti da ostanu, stvaraju i rade, a ne da odlaze.***

***Ovo ćemo postići, ako***

***-uspostavimo puno povjerenje i partnerstvo između:***

***a. institucija lokalne vlasti***

***b. privrednog i javnog sektora***

***c. općinske administracije, građana i NVO***

***- realiziramo naše strateške projekte***

***-učinimo još efikasnijom našu administraciju***

***- stavimo sve resurse u funkciju razvoja***

***d.uspostavom koordinacije, na razvojnim projektima, između općine i viših nivoa vlasti***

## **II OPĆINA ( opći podaci )**

Općina Živinice, kao jedinica lokalne samouprave, formirana je Odlukom Narodne skupštine NR Bosne i Hercegovine, broj:28/59, 19. juna 1959.godine. Danas obuhvata područje od oko 300 km<sup>2</sup> na kome trenutno skupa sa prognaničkom populacijom, nakon izdavanja novih dokumenata po CIPS programu, po realnoj procjeni živi oko 100.000 stanovnika. Od ukupno 2595 prognanika, njih oko 667 ili 242 porodica još uvijek nema uslove da se vrati u svoje domove iz kojih su prognani ili izbjegli tokom agresije na našu zemlju. Ovo u odnosu na 2009. godinu predstavlja umanjeње za 100 rasljenih lica. Preostali broj prognanika situirao se u Živinicama, riješio stambeno pitanje, zaposlio se ili razvio privatni biznis i ima namjeru ostati trajno u Živinicama.

U cilju izvršavanja nadležnosti koje ima kao jedinica lokalne samouprave Općina Živinice je organizirala službe za upravu, stručne službe, javne ustanove i javna preduzeća.

Za vršenje upravnih i stručnih poslova iz samoupravnog djelokruga općine, kao i za vršenje prenesenih poslova uprave iz nadležnosti Kantona i viših nivoa vlasti općina je osnovala sledeće službe za upravu: Služba za budžet i finansije, Služba za prostorno planiranje i komunalne poslove, Služba za lokalni ekonomski razvoj, Služba za geodetske i imovinsko pravne poslove, Služba za opću upravu i društvene djelatnosti, Služba za boračko invalidsku zaštitu i raseljene osobe, Služba za inspeksijske poslove i Služba civilne zaštite.

Za obavljanje stručno-tehničkih i drugih poslova za potrebe organa uprave u općini su osnovane: Stručna služba Općinskog Načelnika i Stručna služba Općinskog vijeća. Službe za upravu i stručne službe zajedno sa Općinskim Načelnikom čine jedinstveni organ uprave općine Živinice.

Za zadovoljavanje potreba i interesa građana u oblastima za koje postoji javni interes u okviru općine Živinice osnovane su javne ustanove: JZU Dom zdravlja Živinice, Centar za socijalni rad Živinice, Dječije obdanište Živinice, Televizija Živinice, Bosanski kulturni centar Živinice i JZU Narodna apoteka Živinice, i javna preduzeća: Horizontala Živinice u mješovitom vlasništvu JKP "Komunalno" d.o.o. Živinice, 51 % vlasništvo općine i 49 % privatni kapital, kao i Sportska dvorana koja je u 100 % općinskom vlasništvu ali su u toku njene statusne promjene.

Na području općine konstituisano je 26 mjesnih zajednica, od kojih četiri čine gradsko naselje. Prema procjenama, u gradu i prigradskim naseljima živi oko 30.000 stanovnika, što je u odnosu na predratni period skoro udvostručen broj.

Nadležnosti i organizacija vlasti općina u Federaciji Bosne i Hercegovine određeni su Ustavom BiH, Ustavom FBiH, te članom 8. Zakona o principima lokalne samouprave u FBiH. U okviru navedenih nadležnosti, općina svojim Statutom reguliše sva za funkcionisanje općine značajna pitanja. Statut je najviši općinski pravni akt i isti je potrebno uskladiti sa Zakonom o principima lokalne samouprave u FBiH.

### **III *NORMATIVNO-STRUČNI POSLOVI***

Težište u normativno stručnim poslovima u protekloj godini bilo je na izradi čitavog seta procedura i općih akata. Osim toga, svi općinski propisi usklađuju se na nivou svake službe sa izmjenama i dopunama zakonske regulative. U kreiranju i pripremi informacija, nacрта i prijedloga akata za Vijeće, angažovana su stručna lica iz općinskih službi, kako bi pripremljeni materijali bili usklađeni sa svim zakonskim propisima. Praksa je pokazala da bez obzira na ovakav način pripreme materijala, često u parlamentarnoj proceduri dođe do donošenja akata čiji su prijedlozi promjenjeni na sjednici Općinskog vijeća, nedovoljno provjereni i koji su ponekad praktično neprovodivi, jer nisu usklađeni sa zakonskim propisima.

U protekloj godini zajedno sa šefovima službi sam pripremio, a općinsko vijeće donijelo čitav niz normativno-pravih akata koji regulišu kako funkcioniranje općinskih službi za upravu, tako i način ubiranja određenih naknada, taksi i drugih prihoda od građana i pravnih lica kojima se puni značajan dio Budžeta općine Živinice.

Kroz vlastiti angažman, koordinaciju i usmjeravanje rada službi općinske uprave, drugih organa i komisija, urađen je najveći dio posla i obaveza u izvršavanju odluka i zaključaka općinskog vijeća, te priprema materijala i dokumenata za općinsko vijeće i vijećničke komisije. Saradnja sa Predsjedavajućim i Sekretarom općinskog vijeća, kao i predsjednicima vijećničkih komisija bila je na potrebnom nivou.

U 2010. godini općinske službe za upravu realizovale su veliki broj poslova i zadataka, a obim i efikasnost u rješavanju zaprimljenih predmeta u upravnom rješavanju dat je u posebnom izvještaju o upravnom rješavanju u 2010. godini i već je razmatran i usvojen kao posebna tačka dnevnog reda na sjednici općinskog vijeća Živinice.

U tekstu koji slijedi daćemo pregled poslova koji su obavljani u Centru za pružanje usluga građanima općine Živinice.

Ukupna površina centra je 157,07 m<sup>2</sup>, od čega 65,84 m<sup>2</sup> površine služi za prijem stranaka, a 81,23 m<sup>2</sup> površine koristi za rad uposlenika. Radno vrijeme centra je kontinuirano od 8:00 do 15:30 h. Trenutno u centru je zaposleno uključujući pisarnicu i server sobu 15 zaposlenih.

Rad centra funkcioniše, po principu, **sve na jednom mjestu**, tako da građani/stranke bez dužih čekanja, prema zakonskim normama za kratko vrijeme bez posjećivanja pozadinskih kancelarija mogu doći do potrebnih dokumenata i informacija iz nadležnosti lokalne samouprave. Centar je opremljen sa 10 računara koji čini integralni dio kompjuterske mreže, tako da su se zahtjevi elektronski putem obrađivali i prosljeđivali službama na upravno rješavanje, korištenjem programske aplikacije Docunova 2.

Obim poslova u Centru se tokom 2010. godine (86 000) neznatno povećao u odnosu na ovjere potpisa, prijepisa i rukopisa u **2009.** godini (80 584).

U 2010.godini u prosjeku dnevno je po različitim osnovama posjetilo centar cca 400 stranaka/ korisnika usluga, a vrijeme trajanja usluge je oko 5 minuta.

U produžetku teksta prikazan je presjek rada u Centru:

r/b	Tačan opis aktivnosti	Realizacija (kvantitativno)	%
1	Izdato izvoda iz matičnih knjiga	13224	10,25
2	Izvršeno upisa u matične knjige	826	00,64
3	Izdato uvjerenja iz knjge državljanstva	3967	03,07
4	Izdato obrazaca za inostranstvo	197	00,15
5	Izdato raznih uvjerenja	92	00,07
6	Izdato Radnih knjižica (obrađeno)	1168	00,09
7	Izvršeno ovjera potpisa, prepisa i rukopisa	98915	76,72
8	Unijeto promjena u matične knjige	2005	01,56
9	Popunjeno statističkih listića	486	00,37
10	Unijeto u matične knjige JMBG	826	00,64
11	Urađeno spiskova djece i omladine	55	00,000
12	Urađeno smrtovnica	263	00,20
13	Izvršeno prepisa duplikata matičnih knjiga	520	00,20
14	Riješeno ostale pošte	3623	02,81
15	Ostali poslovi	2751	02,13
<b>S V E G A :</b>		<b>128918</b>	<b>100 %</b>

Na Info pultu, stranke mogu preuzeti dokumenta o kojima se vodi službena evidencija, tako da je u 2010.godini preuzeto:

- uvjerenja Službe BIZ-a i raseljene osobe ukupno 6286,
- identifikacija i kopija katastarskog plana Službe za geodetske i imovinsko pravne poslove ukupno 4243,

Na info pultu se takođe pružala usluga kopiranja građanima, bez naknade.

Otvaranjem Centra za pružanje usluga građana uspostavljene su procedure koje građanima pružaju mogućnost da na različite načine izraze svoje mišljenje vezano za rad službi organa uprave i to:

- upisivanjem u **Knjigu mišljenja**, građani su 5 puta izrazili pozitivno mišljenje o radu centra,

-upisivanjem u **Knjigu žalbi**, u protekloj godini građani su izrazili svoje nezadovoljstvo radom službi organa uprave 3 puta,

-podnošenje pritužbe vrši se putem programske aplikacije Docunova 2, pritužbe se podnose na pripremljenom obrascu, ovlaštenom uposleniku na info pultu, a rješavaju se na osnovu Pravilnika o pritužbama.

Pritužbe o radu službi organa uprave mogle su se podnijeti i **anonimno**. U prethodnoj godini nije zaprimljena niti jedna pritužba ove vrste.

Tokom protekle godine redovito smo vršili ažuriranje, unos i obradu podataka u bazu matične evidencije, što je prikazano u donjoj tabeli:

<b>r/b</b>	<b>Matične knjige</b>	<b>Realizirano</b>
<b>1.</b>	Matična knjiga rođenih	3.000
<b>2.</b>	Matična knjiga vjenčanih	900
<b>3.</b>	Matična knjiga umrlih	495
<b>4.</b>	Knjiga državljana	3.500
<b>5.</b>	$\Sigma$	<b>7.895</b>

U 2010. godini u procesu provjere podataka matične evidencije koje služe kao prva radnja u nizu za izdavanje ličnih dokumenata (pasoši i lične karte), izvršeno je preko 8.000 provjera. Posebnu pažnju posvetili smo brzini i ažurnosti izvršenja navedenih provjera i na tom planu smo postigli dobre rezultate.

Aktivnosti Centra koje su prikazane kroz gore navedene podatke najslikovitije predstavljaju obim posla koji je obavljen u protekloj godini u jedinstvenom organu uprave općine Živinice. Smatramo važnim za istaći da sve aktivnosti (zahtjevi građana) započinju u Centru, a poslije provedenih postupaka u pozadinskim kancelarijama, ponovo se vraćaju u Centar. U tom smislu, smatram da je ovo najslikovitiji prikaz funkcioniranja organa uprave u cjelini.

#### ***IV LJUDSKI RESURSI***

Nalazimo se u periodu reforme uprave od koje se očekuje da u potpunosti ispuni obaveze koje društvo pred nju postavlja i da pruži kvalitetnu uslugu svojim građanima. U reformskim procesima koji se odnose na javnu upravu, općina se uključuje u realizaciju strategije reforme javne uprave u Bosni i Hercegovini, čija je izrada sa prvim akcionim planom završena 2006. godine. Predviđeno je da se navedena strategija realizuje u tri faze, a prvim akcionim planom obuhvaćena su prva i druga faza do kraja 2010. godine. Ova reforma treba obezbijediti jačanje upravnih kapaciteta u skladu sa evropskim standardima odnosno profesionalniju, efikasniju, odgovorniju, transparentniju i jeftiniju javnu upravu.

Okosnicu takve uprave čine ljudski resursi odnosno ljudi koji u konačnici dobro ili loše obavljaju svoje radne zadatke. Tokom protekle godine smo u fokus stavili upravljanje ljudskim resursima potencirajući da su oni nosioci najvećeg dijela procesa rada, te je na ovom planu nadležna služba vršila intenzivnu analizu potencijala ljudskih resursa na nivou cjelokupnog organa uprave. Rezultati te analize egzaktno pokazuju stanje ovog dijela naših mogućnosti, pa na osnovu dobivenih parametara možemo kreirati akcioni plan upravljanja ljudskim resursima i imati jasnu viziju našeg razvoja u ovom

pogledu. Osim toga, a na osnovu pomenutih parametara, možemo reći da smo tek na početku reforme u oblasti ljudskih resursa, što podrazumijeva dalje stručno osposobljavanje osoblja i podizanje nivoa njihove educiranosti i fluktuabilnosti. Ona dalje podrazumijeva i vrlo važnu koordinaciju budžetskog upravljanja, kontrole i potrošnje.

Takođe, moderna politika upravljanja ljudskim resursima kojoj težimo, značiće i implementaciju novih softverskih rješenja u upravnom postupanju, unapređenje regrutovanja i odabira kadrova, jasne kriterije za napredovanje, upravljanje učinkom odnosno mjerenje učinka na bazi plana i ostvarenih ciljeva, edukacija i obuka, kvalitetnije primjene disciplinskih kapaciteta kao i unapređenje upravnog odlučivanja, komuniciranja i informatizacije.

Osim toga, značajan dio ove reforme ima za cilj i smanjenje administracije, odnosno smanjenje broja zaposlenika i dovođenje na nivo standarda koji se kao zadaci pred nas postavljaju u ovom sveobuhvatnom procesu.

Općina Živinice nema povoljnu strukturu uposlenih u administraciji i istu je potrebno mijenjati u pravcu povećanja uposlenih visokostručnih kadrova. U našem slučaju ovo treba raditi planski i postupno. Posebno je izražen nedostatak visokoobrazovanih kadrova pravne struke.

#### Struktura stručne spreme zaposlenih u organu uprave

<b>R/b</b>	<b>Stručna sprema</b>	<b>Broj</b>
1	VSS	43
2	VŠS	8
3	SSS	62
4	KV	7
5	OŠ	10
6	NK	2
7	Bez škole	1
8	Svega	133

Pregled spolne strukture zaposlenih u organu uprave na dan 31.12.2010. godine

R/b	Naziv službe	Broj uposlenih	Muški	Ženski
1.	Općinsko vijeće	6	1	5
2.	Općinsko pravobranilaštvo	1	1	0
3.	Stručna služba općinskog načelnika	6	3	3
4.	Služba za opću upravu i društvene djelatnosti	37	22	15
5.	Služba za geodetske i imovinsko-pravne poslove	25	14	11
6.	Služba zapoduzetništvo i inspekcijske poslove	7	6	1
7.	Služba za budžet i finansije	9	1	8
8.	Služba za stambeno-komunalne poslove	24	15	9
9.	Služba za boračko-invalidsku zaštitu i ras.lica	6	3	3
10.	Služba za lokalni ekonomski razvoj	8	5	3
11.	Služba civilne zaštite	4	3	1
	<b>UKUPNO</b>	<b>133</b>	<b>74</b>	<b>59</b>

Tabela daje prikaz u odnosu zaposlenih muškaraca i žena sa aspekta ravnopravnosti spolova iz kojeg odnosa se vidi da je uposleno **56 %** muškaraca i **44 %** žena.

Zaposlenost po nacionalnoj strukturi izražena je u odnosu da na 133 zaposlena 9 je pripadnika **hrvatske nacionalnosti** ili **7 %**, **srpske nacionalnosti** 2 zaposlena ili **1 %** i ostalo su **Bošnjaci** 122 ili **92 %**.

#### **V USLOVI I SREDSTVA ZA RAD**

U protekloj godini nastavili smo sa aktivnostima na stvaranju boljih uslova za rad zaposlenika i općinskih vijećnika, što smatramo bitnim preduvjetom za uspješan nastavak reforme općinske uprave.

Naime, izgrađena Sale za sastanke i Sale za sjednice općinskog vijeća pokazale su svoju punu funkcionalnost u 2010. godini. U istima su instalirana oprema za audio-video projekciju i klima uređaji. U 2010.godini otvorili smo

Salu za dozvole i time nastavili kontinuirano razvijanje kapaciteta uprave u cilju da građani lakše, brže i jednostavnije rješavaju svoje zahtjeve iz oblasti građenja i izdavanja odobrenja za rad.

Izgradili smo baze podataka neophodne za rad organa uprave, a provodimo njihovo kontinuirano ažuriranje i digitalizaciju, čime postižemo spremnost da u svakom trenutku odgovorimo na zahtjeve naših građana. Nastavljeni su radovi na izradi i dogradnji instalacija računarske mreže za sve općinske službe, koje su sada umrežene i povezane u jedan koherentan informatički sistem interne i eksterne razmjene podataka. Općina Živinice raspolaže i u svom radu primjenjuje savremene informatičke programe DocuNova 2.0, FinNova, MatEv, Infodesk i program za vođenje katastra nekretnina, koji omogućavaju brže i efikasnije pružanje usluga građanima.

Rukovodeći se potrebom za stvaranjem boljih i sigurnosnih uvjeta ljudi i materijalnih sredstava, instaliran je i video-nadzor u obje zgrade organa uprave, odnosno njihovom vanjskom dijelu, te unutarjem pokrivanju Šalter sale. Osim toga, izgradili smo i vatrodojavni sistem u Šalter Sali i prostoru za arhivu u zgradi br.2 u kome je u toku sređivanje arhivske građe.

Snabdijevanje općine električnom energijom u protekloj godini bilo je redovno, a njena potrošnja u okviru planirane. Grijanje je besprijekorno funkcionisalo toplinskom energijom iz vlastite kotlovnice . Nastavili smo da povjerena sredstva i opremu racionalno koristimo i domaćinski upravljamo.

Namještaj i ostala kancelarijska oprema organa uprave se već dugo koriste i u dosta lošem su i dotrajalom stanju, tako da je neophodna nabavka određenih količina zamjenskih sredstava.

Tabela: informaciono-tehničkog stanje u organu uprave općine Živinice

	TIROJ RAČUNARA	TIROJ PRINTERA	TIROJ PLOTERA	TIROJ KOPIRA	TIROJ SCANERA	TIROJ SERVERA	PPA	AJ	RJ	KAMERE
Zgrada II1	19	11		1	1	3	7	3	2	3
Zgrada II2	19	11	1				2			
Zgrada II3	24	12	1		2		2			
Zgrada II1	12	5		1			4	11	2	1
Zgrada II2	12	6					1			
Zgrada II3	3	2					2			
<b>UKUPNO</b>	<b>89</b>	<b>47</b>	<b>2</b>	<b>2</b>	<b>4</b>	<b>3</b>	<b>16</b>	<b>17</b>	<b>4</b>	<b>11</b>
<b>UKUPNO INVESTICIJA 133</b>	<b>66,91%</b>	<b>39,33%</b>	<b>1 RAČUNAR</b>	<b>1 AJ</b>	<b>1 PLOTER</b>	<b>1 KOPIR</b>	<b>1 SCANER</b>	<b>1 SERVER</b>	<b>1 PPA</b>	<b>1 KAMERA</b>

Simboli: PPA-protivpožarni aparati      AJ-automatski javljači požara      RJ-ručni javljač požara


## VI BUDŽET

Budžet općine Živinice za 2010. godinu, kada su u pitanju prihodi, ostvaren je sa 13.803.560,00 KM, što u odnosu na plan 2010.godine iznosi 85 %, a u poređenju sa izvještajnim periodom za 2009.godinu iznosi 120 %. Moramo naglasiti da su u strukturi ukupnih prihoda, prihodi od poreza imali ostvarenje od 8.175.570,00 KM, neporezni prihodi od 3.149.237,00 KM i tekuće potpore (grantovi) 2.478.753,00 KM.


Važno je napomenuti da je otplata deficita – duga općine u prošloj godini iznosila 3.014.482,00 KM, što pokazuje nastavak odgovorne i domaćinske politike općinskih vlasti prema svojim povjeriocima.

Budžet je jedan od najvažnijih instrumenata razvoja općine. Praćenje stanja budžeta (prihoda i rashoda) i briga o njegovom izvršenju bili su naši može se reći svakodnevni zadaci. Iskazani deficit smo držali pod kontrolom a osnovni uzrok deficita u budžetu pored nekih nenaplaćenih neporeskih prihoda predstavlja i naše opredjeljenje da ulažemo u razvojne programe i projekte. Znači da je deficit budžeta u osnovi nastao kao rezultat kapitalnog ulaganja u razvoj općine.

U grafikonima koji slijede dati su uporedni pokazatelji za budžet :



Grafikon 1. Prikaz ostvarenja prihoda u odnosu na plan budžeta



## ***VII PROSTORNO PLANIRANJE, URBANIZAM I STAMBENO-KOMUNALNA PROBLEMATIKA***

Najznačajniji projekt u 2010. godini koji je nadležna služba uradila je implementacija projekta četiri kanalizaciona kolektora na području općine Živinice, a sve u saradnji sa EBRD i IPA fondovima. Pri projektovanju ovih kolektora ostavljena je mogućnost proširenja kanalizacione mreže i na ostala područja općine Živinice ( Višća, Dubrave, Kovači i Đurđevik Dom). Radovi na ovom projektu uspješno su završeni, izvršen je tehnički prijem kompletnog objekta. Projekat još nije u kompletnoj funkciji a bit će pušten u rad izgradnjom prečišćavača otpadnih voda.

Ovim projektom biće obuhvaćeno novih 30 000 korisnika kanalizacione mreže na području MZ-a Centar, Rudar, Oskova, dio Starog Đurđevika, Strašanj, Maline i Šarenjak. Takođe, u toku su aktivnosti na pribavljanju svih potrebnih saglasnosti za izgradnju prečišćavača otpadnih voda čija je lokacija predviđena na ušću Oskove u Spreču, a sva 4 gore navedena kolektora projektovana su tako da ovo postrojenje može izvršiti njihov prihvata i prečišćavanje.

Nastavljeno je kontinuirano uređivanje pješačke zone u ul. Alije Izetbegovića, kao i i pješačke zone kod Islamskog centra. U II ulici, u cilju poboljšanja sigurnosti u saobraćaju, urađeno je i novo autobusko stajalište. U užoj gradskoj zoni završen je park iza zgrade Sarajka, završena realizacija projekta izgradnje parkirališta-trga iza zgrade općine pa je na ovaj način dobijeno novih 120 parking mjesta.

Sa JP “Komunalno” dd Živinice potpisali smo ugovor o zajedničkoj komunalnoj potrošnji i održavanju grada. Dosta novca je uloženo u podizanje novih cvijetnih aranžmana u parkovima kao i sadnju ukrasnog rastinja i drveća.

Komunalna problematika je bila i ostala ključna oblast za općinu, kao osnovnu jedinicu lokalne uprave. U prošloj godini, ustaljena sistemska rješenja dobro su funkcionisala. Osim teškoća u snabdijevanju grada pitkom vodom, čiji su uzrok velika dugovanja za potrošnju vode i dotrajala gradska vodovodna mreža, možemo konstatovati da su druge oblasti zajedničkih komunalnih potreba bile kvalitetno pokrivena. Održavanje puteva, gradskih ulica, lokalnih i nekategorisanih puteva, kao i drugih javnih površina, bilo je kvalitetno. Postavljanjem zatvorenih kontejnera pored stambenih zgrada, kao i velikog broja malih korpi za smeće duž pješačke zone i u gradskim parkovima higijena grada podignuta je na veći nivo.

Na području čitave teritorije općine Živinice izvršeno je uklanjanje svih divljih deponija smeća.

Naši naponi na rješavanju pitanja kvalitetnijeg vodosnabdijevanja se ogledaju u sljedećem:

1. na području lokaliteta Mišići-Barice izvršena su geo-istraživačka bušenja, a nakon toga i urađena dva nova bunara čiji je kapacitet oko 30 l/sec.
2. na osnovu urađene projektne dokumentacije a u saradnji sa Ministarstvom za poljoprivredu, vodoprivredu i šumarstvo TK obezbjeđena su sredstva u iznosu od 100.000,00 KM za početak realizacije vodosnabdijevanja grada Živinica.
3. osim toga, općina je pružila svu potrebnu stručnu i finansijsku pomoć za niz poboljšanje vodosnabdijevanja lokalnih-mjesnih i grupnih vodovoda ( Šišići, Priluk, G.Višća, Kopjevići, Đurđevik i dr.)

U cilju realizacije projekta toplifikacije grada urađena je kompletna tehnička dokumentacija i prikupljene sve potrebne dozvole za sekundarnu mrežu toplovoda grada Živinica. Na osnovu ovog projekta može se pristupiti izvođenju radova što će zavistiti od finansijskih sredstava i raspoloživog izvora toplotne energije.

Prateći potrebe općine Živinice u okviru Službe za prostorno planiranje i komunalne poslove izvršene su organizacijske promjene i formiran novi odsjek „Odsjek za upravljanje i unutrašnju zaštitu općinske imovine” sa osnovnom namjenom da ustroji evidenciju i vodi brigu o općinskoj imovini.

## **VIII BORAČKA POPULACIJA**

Nastavljena je primjena Zakona o osnovnim pravima boraca usvojenog na nivou Federacije, a mi smo na općinskom nivou ustrojili i kompletnu regulativu iz kantonalnog Zakona o dopunskim pravima boraca. Tako su ažurirana donešena sva akta u nadležnosti općinskog Načelnika, kojima se regulišu olakšice i oslobađanja od plaćanja općinskih taksi i drugih vrsta naknada.

Donešen je i Pravilnik o kriterijima za aplikaciju i dodjelu jednokratnih novčanih pomoći na nivou Službe za boračko-invalidsku zaštitu, kao i subvencioniranje troškova sahrane za lica i kategorije iz pomenutog Zakona.

U prošloj godini, nastavljena je kontinuirana materijalna i finansijska podrška kategoriji lica iz boračke populacije gdje su putem općinskog Budžeta, a preko Centra za socijalni rad izdvajana novčana sredstva za JNP.

Za stambeno zbrinjavanje korisnika BIZ-e po javnom pozivu Ministarstva za boračka pitanja TK, u protekloj godini je podneseno 120 zahtjeva što je manje u odnosu na 2009. u kojoj je bilo podneseno 298 zahtjeva. Isti su u službi obrađeni i proslijeđeni 1-stepenoj komisiji formiranoj odlukom općinskog Načelnika, a kao rezultat tih aktivnosti pozitivno je riješeno 41 zahtjeva sa ukupnim iznosom od 447.901,22 KM dodijeljenih novčanih sredstava. Na odluke 1-stepene komisije uloženo je 67 prigovora, te su isti proslijeđeni 2-stepenoj komisiji koja je uvažila 18 prigovora, a odbila 49 prigovora kao neosnovane. Ministarstvo za boračka pitanja TK obezbjedilo je 24. 000,00 KM za ostale socijalno-ugrožene pripadnike boračkih populacija.

Novčana sredstva za stambeno zbrinjavanje boračke populacije za 2009.godinu realizovana su tek u 2010.godini.

Općina Živinice je do sada kroz razne vrste aktivnosti pomagala i podržavala rad boračkih udruženja i organizacija i uvijek je na njihov zahtjev pružala svu neophodnu finansijsku i stručnu pomoć, naročito za manifestacije i obilježavanja značajnih datuma iz odbrambeno-oslobodilačkog rata.

Takođe je općina Živinice iz svojih sredstava podržala izgradnju Spomen obilježja šehidima /poginulim borcima i neke druge aktivnosti koje su u osnovi bile manje finansijske vrijednosti.

## ***IX POVRATAK***

Po evidencijama nadležne službe u januaru 2010.godine bilo je 2.690 raseljenih osoba a u decembru 2010.godine 2.595 što je manje za 95 osoba. Navedeni podatak nam govori da se broj raseljenih osoba smanjuje, u neznatnom obimu i sa istim nemožemo biti zadovoljni. Međutim, pošto se radi o osjetljivoj i složenoj problematici pa i opredjeljenjem mnogih osoba da ostanu na ovom području procjene i predviđanja u ovoj oblasti su nepredvidive.

Želimo da napomenemo da projekat koji se vodi na nivou države putem Ministarstva za ljudska prava i izbjeglice (projekat CEB-a), a koji se realizira uz pomoć Razvojne banke Vijeća Evrope, nadležnih ministarstava, UNHCR-a i općina, ima za cilj obnovu i sanaciju stambenog fonda u prijeratnom mjestu prebivališta korisnika kolektivnih centara i naselja.

Još uvijek su aktivni tj.naseljeni kolektivni centri Višća i Karaula o kojima brigu vodi nadležna općinska služba a općina izmiruje obaveze za komunalne usluge.

Bez obzira što općina Živinice nema neku konkretnu nadležnost nad ovom populacijom, vrlo često većina brige o rješavanju njihovih problema i

potreba padne na općinu. Mi te probleme pokušavamo riješiti, ako je moguće samostalno, a ako ne, onda obraćanjem nadležnom ministarstvu.

Ističemo da je materijalni položaj izbjeglih i raseljenih lica težak i da po procjenama oko polovine porodica nema nikakvih primanja.

Donatorska pomoć raseljenim licima prehrambenim artiklima i drugim namirnicama svedena je na minimum.

U skladu sa odlukom Vlade TK o prenosu objekata na općinu Živinice ( 28 kuća holandske vlade na području općine Živinice ) pokrenut je postupak upisa prava vlasništva i legalizacije izgradnje samih objekata zato što za iste ne postoje odobrenja za građenje. U navedenim objektima je ukupno smješteno 30 porodica sa 132 člana. U naselju Višća i Karaula smješten je određen broj lica-porodica u stanju socijalne potrebe iz reda domicilnog stanovništva. Od toga je 6 porodica sa 15 članova u naselju Višća, a 25 porodica sa 72 člana u naselju Karaula. Stambeni uslovi življenja u ovim objektima su zadovoljavajući.

U 2010. godina nije bilo povratka građana srpske nacionalnosti na područje općine Živinice, tako da zvanično nije registrovan niti jedan povratnik. Općina Živinice je aplicirala kod nadležnog državnog ministarstva za ljudska prava i izbjeglice sa projektom izgradnje vodovoda u naseljenom mjestu Krivača, put u naseljenom mjestu Vrnojevići.

Na kraju možemo konstatovati da je povratak raseljenih lica smještenih na područja ranijeg prebivališta (Srebrenica, Bratunac, Milići, Zvornik i druga mjesta) gdje su donatorskim sredstvima izvršene obnove porušenih stambenih jedinica, neznatan.

## ***X ZAPOŠLJAVANJE I SOCIJALNA POLITIKA***

Zapošljavanje je definitivno generator razvoja lokalne zajednice, a time i društva u cjelini. Protekla godina rezultirala je negativnim trendom i značajnim padom zaposlenosti izazvano globalnom recesijom. Iako broj nezaposlenih na Birou svake godine poraste za generaciju srednjoškolaca i studenata, općina Živinice uspijeva održati balans na drugoj strani poluge ovog značajnog pokazatelja, odnosno novim radnim mjestima. Brojčano izraženo, to izgleda ovako:

Broj nezaposlenih u 2010. godini bio je 13 013 osoba, što je u odnosu na 2009. godinu predstavlja povećanje nezaposlenih osoba na području naše općine.

Sto se tiče strukture privrede, po broju registrovanih 326 firmi (prema podacima Agencije za finansijske i informativne poslove, a prema broju završnih računa za 2009. godinu), što je 4,15 % više u odnosu na prethodnu godinu.

Trgovina čini 155 ili 47,55% u odnosu na proizvodnju koju čine 112 ili 34,35%, te usluge 59 ili 18,10%. Po prihodima na trgovinu otpada 54,53% u odnosu na

pomenute oblasti, a po broju radnika 21,44%, a proizvodnja uzima 33,61% ili po broju radnika 68,33%, dok usluge čine 10,23%.

Bruto prihodi privrednih društava, po posljednjim podacima koje imamo ( 31.12.2009. godine) iznose preko 434.715.199,00 KM, neto dobit iznosi 9.018.775,00 KM, dok gubitak iznosi 13.499.527,00 KM. Poređenjem prihoda i rashoda u ovom periodu može se zaključiti da su ukupni prihodi manji za 18 %, neto dobit manja za 41 % a ukupni gubitak veći za 86 % u odnosu na prethodni period. Poslovanje privrede je negativno, jer je iskazana dobit manja od gubitka. Gore navedeni podaci predstavljaju opadajući trend koji u stavri predstavlja opštu sliku privrede u našoj zemlji i šire.

Za nas je vrlo značajno da u svojoj viziji razvoja, sa posebnim interesovanjem, definiramo poljoprivredu i poduzetništvo kao strateške pravace. U protekloj godini posvetili smo značajnu pažnju razvoju individualnog poljoprivrednog proizvođača, poduzetništvu u poljoprivredi i iskorištenosti poljoprivrednog zemljišta. U toj oblasti imamo dobrih rezultata, jer smo na vrijeme prepoznali njihove interese i pomogli ih u projiciranju njihovog razvoja na tom polju. Ovo smatramo jako važnim posebno zbog toga što je Sprečka dolina vrlo zanimljiva velikim industrijskim proizvođačima koji bi željeli da zakupom većih površina zemljišta na duži period uspostave monopol nad poljoprivrednom proizvodnjom i tržištem poljoprivrednih proizvoda. U tom smislu, blagovremenim reagovanjem i odgovarajućim aktivnostima smo zaustavili mogućnost da se zemlja naših seljaka-farmera u bescijenje preda na korištenje velikim monopolima-poljoprivrednim proizvođačima. Na taj način smo sačuvali okosnicu razvoja i egzistencije života na selu, ali i unaprijedili poljoprivrednu proizvodnju na području naše općine u tom prepoznatom dugoročnom strateškom pravcu.

Ipak, ono što zabrinjava je činjenica da je cijeli svijet, pa tako i naša zemlja i općina ušla u nezapamćenu ekonomsku krizu, čiji se efekti već osjete, ne samo po padu proizvodnje nego nažalost i po sve većem i masovnijem otpuštanju radnika. I dalje zabrinjava status stvarno nezaposlenih lica, koja su bukvalno na ivici životne egzistencije. Posebnu kriznu grupu čine demobilisani borci i lica koja zaposlenje traže više od 10 godina, jer oni uskoro neće biti u poziciji da steknu penziju i kada bi se zaposlili. Stoga, naš Centar za socijalni rad, osim zbrinjavanja preko 1.500 korisnika socijalne pomoći i tuđe njege, mora da zbrinjava makar jednokratno, i kategorije nezaposlenih sa dna egzistencijalne piramide.

Općina Živinice spada u red prosječno razvijenih općina u Bosni i Hercegovini. Zauzima 24. mjesto u Federaciji Bosne i Hercegovine, po indeksu razvijenosti koji iznosi 104,8 što znači da je razvijenija od prosjeka za 4,8 %.

BDP po glavi stanovnika iznosi 3 589 KM što je 55,10 % BDP po glavi stanovnika F BiH.

## ***XI INVESTICIJE, PROJEKTI INFRASTRUKTURE I RAZVOJ***

Investiciona ulaganja na području općine Živinice u prošloj godini bazirana su na sredstvima općinskog Budžeta, sredstvima kantonalnih i federalnih institucija od kojih smo dobivali neznatan dio sredstava prikupljenih kroz javne prihode sa područja općine Živinice, sredstvima međunarodnih vladinih i nevladinih organizacija, ali i sredstvima prikupljenim od građana.

Svakako, težište ukupnog razvoja u općini bilo je na projektima i investicijama infrastrukture. Kontinuirano se radilo na asfaltiranju puteva i ulica. Naš koncept, da u pomanjkanju finansijskih sredstava u budžetu općine, u partnerstvu sa građanima po već oprobanoj principu zajedničkog ulaganja, nadomjestimo nedostajući dio finansijskih sredstava pokazao se ispravnim i djelotvornim. Zahvaljujući zajedničkim naporima u protekloj godini, izgradili smo asfaltne puteve u 20 MZ-i u dužini od preko 36 km. Vrijednost predmetnih radova realiziranih u 2010. godini iznosila je preko 2.500.000,00 KM.

Izgrađeno je oko 20 km javne rasvjete, čime smo uticali na stvaranje povoljnije klime opće sigurnosti za građane, sa ulaganjem od oko 250.000,00 KM.

Izgrađen je most "Glošci" na lokalnom putu u MZ Donja Višća, na rijeci Oskova čime je obezbjeđena prohodnost na jednom djelu puta koji povezuje općinu Živinice sa općinom Banovići a izgradnjom novog mosta Polja u narednom periodu obezbjedićemo cjelokupnu prohodnost na navedenom putu.

Provedena je procedura javnih nabavki, ugovoreni su radovi na izgradnji novog mosta na Lijehi a isti će biti izgrađen u 2011. godini.

Nastavljajući projekat podrške za područja koja su slabije razvijena i slabije naseljena područja izvršena je izgradnja novih asfaltnih puteva Živčići-Palež, Zukići-Kuljan i Ciljuge-Spreča (pored pomoćne piste Ciljuge), sa ulaganjem 416.238,50 KM.

Projekat uređenja korita rijeke Spreče nizvodno od mosta na magistralnom putu M-18 u Malinama do ušća u jezero Modrac je realiziran, ali je još uvijek ostalo neriješeno pitanje spajanja novoizgrađenog korita rijeke Spreče uzvodno od mosta na mag. putu M-18. Nastavićemo napore da se i ovo pitanje riješi u narednom periodu, jer time stvaramo uslove za normalan rad poduzetničkih kapaciteta u industrijskoj zoni Maline i preventivno djelujemo na zaštitu od poplava.

Stanogradnja u samom gradu i zoni obuhvata regulacionih planova je nižeg intenziteta nego u prethodnom periodu.

Nastavljena je realizacija projekta rekultivacije degradiranog zemljišta (zapadnog odlagališta bivšeg PK Bašigovci) za šta su obezbjeđena značajna finansijska sredstva.

## **XII OBRAZOVANJE**

**Predškolsko obrazovanje** kojim se obezbjeđuju uslovi za njegu, razvoj, odgoj i obrazovanje djece u dobi od jedne do šest godina odvija se u okviru JU „Dječije obdanište“ Živinice. Ovim oblikom obrazovanja u školskoj 2009/2010 godini (u drugoj polovini godine broj djece se povećao) obuhvaćeno je 130 djece predškolskog uzrasta. U školskoj 2009/2010. godini rad JU „Dječije obdanište“ odvijao se u teškim materijalno finansijskim uslovima, jer je donesena presuda kojom je Dječije obdanište bilo u obavezi da plati razliku plaća i drugih primanja zaposlenicima koji su podnijeli tužbu i na sudu ostvarili to pravo. Među podnosiocima tužbe bila je i tadašnja direktorica i ista je takođe ostvarila to pravo.

Obdanište je poslije rješavanja problema naplate potraživanja po presudi suda, i promjene direktora počelo izlaziti iz poteškoća i u drugoj polovini godine stabilno poslovalo, podiglo aktivnost svog angažmana i povećalo broj djece. Trend rasta aktivnosti, finansijskog rezultata i broja korisnika nastavljen je i krajem 2010.godine.

Objekat obdaništa je u cjelini gledano u lošem fizičkom stanju, ali je i ovdje potrebno posmatrati aktivnosti koje su preduzete u drugoj polovini godine a rezultati su: na objekat je stavljena fasada, izrađena ograda sa ulaznim kapijama, djelimično rekonstruisan kotao za grijanje i izvršeno drugo potrebno tekuće održavanje.

U 2010.godini, JU Dječije obdanište stabilno je finansirano iz općinskog budžeta a općina je izmirila dio obaveza po sudskoj presudi uz redovno finansiranje plata zaposlenika.

I pored navedenih problema ciljevi i zadaci predviđeni programom rada su realizovani. Općinsko vijeće i općinski Načelnik upoznati su sa stanjem u ovoj ustanovi kroz izvještaj o radu i program rada za narednu godinu.

**Osnovnim obrazovanjem** učenika bavi se 9 (devet) osnovnih škola koje je u školskoj 2009/2010. godini pohađalo 6596 učenika. Upoređujući podatke u ovoj školskoj godini sa prošlom može se konstatovati da je broj učenika smanjen.

**Srednjim obrazovanjem** u okviru Mješovite srednje škole i Gimnazije obuhvaćeno je 1490 učenika, od toga u MSŠ 1087 a u Gimnaziji 403 učenika. U Mješovitoj srednjoj školi obrazuju se učenici za zanimanja mašinske, elektro, drvoprerađivačke i poljoprivredne struke.

Kad je riječ o stanju u oblasti osnovnog i srednjeg obrazovanja može se konstatovati stalni napredak u nekoliko zadnjih godina. Finansiranje plaća i materijalnih troškova je stabilno i redovno. Primjetan je i trend realizacije niza projekata kantonalnog i federalnog Ministarstva obrazovanja kojima se unapređuju uslovi za odvijanje odgojno-obrazovnog procesa kao što su projekti rekonstrukcije i uvođenja centralnog grijanja, izgradnja dodatnog školskog prostora i renoviranje postojećih, unapređenje sanitarnih i higijenskih uslova,

rekonstrukcije dotrajalih krovova, opremanje školskih biblioteka, opremanje učionica školskim namještajem, nabavka kompjutera i drugih nastavnih sredstava. U ovom smislu općina Živinice se uključila u okviru svojih mogućnosti u realizaciju pokrenutih projekata. Osim učešća u ovim aktivnostima općina Živinice je podržavala učenike naših škola u takmičenjima iz raznih oblasti znanja, sporta, kulture i umjetnosti. Za učenike koji su postigli značajne rezultate i uspjehe na ovim takmičenjima organizovani su prijemi kod općinskog Načelnika prilikom kojih su im uručene odgovarajuće pohvale i nagrade.

Najizraženiji problemi ispoljeni su u II Osnovnoj školi zbog nedostatka učioničkog prostora kao i u školi Gornje Živinice koja nema fiskalnu salu. Donacijom Japanske vlade izvršena je nabavka nastavnih sredstava, učioničkog namještaja, opreme i izvršena zamjena prozorskih otvora u osnovnoj školi Gornje Živinice. Pošto su i gimnazija i MŠŠ smještene u istoj zgradi i tu se osjeća nedostatak prostora za normalno odvijanje odgojno-obrazovnog procesa ali je dogradnjom prostora za potrebe gimnazije ovaj program u većoj mjeri riješen, pa su u tom smislu stvoreni povoljni uslovi za rad.

Sadržaji predviđeni nastavnim planovima i programima su realizovani u cjelini. Općinsko vijeće i općinski Načelnik su o stanju u školstvu od strane službe upoznati kroz informacije: o planu upisa u I razrede srednjih škola na području Tuzlanskog kantona, o izvršenom upisu u I razrede osnovnih i srednjih škola i informaciju o uspjehu učenika na kraju školske godine u osnovnim i srednjim školama naše općine.

### ***XIII KULTURA I INFORMISANJE***

U **oblasti kulture** koja obuhvata sve oblike stvaralaštva, prenošenja i očuvanja kulturnih vrijednosti općina Živinice je svoju aktivnost usmjerila na pitanja koja se tiču ostvarivanja javnog interesa u ovoj oblasti. To se prije svega odnosi na stvaranje mogućnosti za razvoj kulturnih djelatnosti i obezbjeđenje uslova za stvaranje, prenošenje i dostupnost kulturnih vrijednosti građanima općine Živinice. U tom smislu u budžetu su obezbijeđena sredstva za rad ustanova i institucija kulture kao što su JU BKC, KUD, UG „Scena“- Gradsko pozorište, BZK „Preporod“, HKD „Napredak“ i sredstva za kulturne programe i projekte od interesa za općinu. Općina Živinice je neposredno saradivala sa ustanovama i institucijama kulture u realizaciji utvrđenih i usvojenih projekata i programa, a vršen je i nadzor nad njihovom realizacijom.

U 2010. godini na području općine Živinice odvijale su se raznovrsne kulturne aktivnosti od kojih ćemo istaći najznačajnije. Povodom obilježavanja svih značajnih datuma organizovane su svečane akademije.

Kao i prethodnih godina realizovana je kulturna manifestacija “Smotra kulturno-umjetničkog stvaralaštva“ učenika osnovnih škola na kojoj je uz učešće

oko 1000 učenika i nastavnika prezentovano stvaralaštvo iz oblasti drame, recitovanja, muzike, folklora i likovne umjetnosti. Manifestacija se održavala dva dana u velikoj sali BKC-a. Općina Živinice je u saradnji sa školama-aktivima direktora vodila cjelokupni proces realizacije ove manifestacije.

Manifestacije kulturnog sadržaja održavane su u mjesnim zajednicama, školama i dječijem obdaništu u sklopu obilježavanja različitih važnih aktivnosti.

Održana je manifestacija „Likovna kolonija” Toplice u organizaciji BZK Preporod Živinice a uz finansijsku podršku općine.

U **oblasti informisanja** građana i dalje je jedino glasilo JU RTV Živinice koja profesionalno obavlja svoju zadaću pravovremenog i objektivnog informisanja građana u svim značajnim dešavanjima na području općine Živinice i šire.

Posebno značajan angažman TV Živinice je imala u praćenju aktivnosti vezanih za opće izbore nastojeći da građane općine Živinice informiše o svim značajnim dešavanjima na tom planu.

O stanju u oblasti kulture i informisanja općinsko vijeće i općinski Načelnik upoznaju su kroz izvještaje o radu JU BKC i JU RTV i programe rada ovih ustanova .

Ocjenjujući stanje u oblasti kulture i informisanja iz pozicije zakonom definisanih nadležnosti općine možemo konstatovati da je općina Živinice učinila značajan napor da omogući institucijama kulture i informisanja kao i kulturnim radnicima da stvaraju, prenose i učine dostupnim kulturne vrijednosti građanima. Za finansiranje ustanova i institucija kulture, kao i za realizaciju usvojenih projekata i programa općina Živinice je u 2010. godini, obezbjedila sredstva i stabilno finansiranje iz općinskog budžeta.

#### ***XIV SPORT***

U oblasti sporta općina Živinice je svoju aktivnost usmjerila na provođenje zakonom definisanih nadležnosti općine u ovoj oblasti. To se prije svega odnosi na stvaranje uslova za zadovoljavanje lokalnih potreba građana u sportu i sportskoj rekreaciji. U tom smislu općina Živinice je u nekoliko zadnjih godina učinila značajan napor u oblasti izgradnje sportske infrastrukture od sportske dvorane do brojnih sportskih poligona u mjesnim zajednicama čime je omogućila potpunije zadovoljavanje potreba građana u sportu i sportskoj rekreaciji.

U 2010.godini općina Živinice je nastojala pažnju usmjeriti na sportske aktivnosti koje doprinose unapređenju zdravlja djece i omladine, sportski odgoj i obrazovanje, razvoj kvalitetnog i vrhunskog sporta kroz finansijsku podršku takvim aktivnostima.

Sportska djelatnost na području naše općine odvija se kroz rad sportskih klubova i kroz aktivnosti sportskog saveza.

Općina Živinice je u 2010.godini za oblast sporta izdvojila sredstva za finansiranje trenažnog procesa u sportskoj dvorani, redovnog rada sportskog saveza, sponzorstvo klubovima koji su zastupljeni u višim rangovima takmičenja, participaciju u podmiranju troškova kotizacije i takmičenja, kao i podršku takmičenjima učenika osnovnih i srednjih škola i donacije za održavanje sportskih manifestacija turnirskog karaktera.

Sportski savez koji je zamišljen kao krovna sportska organizacija koja usklađuje rad sportskih klubova i usmjerava razvoj sporta na području općine Živinice i mjesto gdje se klubovi dogovaraju o raspodjeli ukupnih sredstava namijenjenih sportu u ovoj godini iako postoje određeni pozitivni pomaci u odnosu na prethodni period nije ostvario tu svoju ulogu.

Pored podržavanja klubova općina je u 2010.godini za NK Slaven Živinice izdvojila 30.000,00 KM iz općinskog budžeta u cilju izgradnje određenih objekata koji su bili uslov za nastavak takmičenja u Federalnom rangu.

Kao rezultat povećane podrške razvoju sporta u posljednjih nekoliko godina i stvaranju povoljnijih uslova za bavljenje sportom naši klubovi i pojedinci ostvaruju zapažene uspjehe na bosansko hercegovačkoj i međunarodnoj sportskoj sceni.

Masovnost u sportu kao i razvoj sporta u osnovnim i srednjim školama za nas imaju prioritet u odnosu na bavljenje sportom u klubovima a posebno onim klubovima koji se profesionalno bave sportskim aktivnostima. Smatramo da smo sa aspekta osiguranja javnog interesa u sportu napravili pozitivne pomake kroz obezbjeđenjem objekata za sport i rekreaciju i izdvajanjem finansijskih sredstava u općinskom budžetu. Podrškom sportskim klubovima zadržali smo bavljenje sportom mladih u seoskim i gradskim sredinama na nivou prethodnog perioda.

## ***XV Z D R A V S T V O***

U oblasti zdravstva aktivnost je usmjerena na ostvarivanje zakonom definisanih nadležnosti općine. Ta nadležnost se odnosi na omogućavanje obaveznih imunizacija stanovništva i određivanje ljekara za utvrđivanje uzroka smrti izvan zdravstvene ustanove. Vršenje ovih poslova općina Živinice je posebnim odlukama povjerala JZU“Dom zdravlja“ Živinice s tim da općina snosi troškove zdravstvene ustanove koji nastanu vršenjem tih poslova. U 2010.godini utrošeno je oko 15 000 ampula za vakcinisanje djece.

Ljekari zdravstvene ustanove izvršili su oko 220 mrtvozorstava u ovoj godini.

Osnovna aktivnost u 2010.godini kad je u pitanju oblast zdravstva odvijala se na realizaciji projekta porodične medicine u saradnji sa kantonalnim i federalnim Ministarstvom zdravlja. Kao rezultat te aktivnosti do sada su adaptirane i opremljene ambulante porodične medicine u Kovačima i Gornjoj Lukavici.

Mjesna zajednica Bašigovci, je jedina MZ u kojoj nije realizovan projekat porodične medicine a koja po standardima ispunjava uslove. Osnovni razlog je

nepostojanje prostora u vlasništvu općine odnosno mjesne zajednice u kojem bi ambulanta bila smještena.

Na području općine Živinice prije 2010.godine bilo je 18 timova porodične medicine, a u 2010.godini je obrazovano još 11 timova, tako da ukupan broj timova porodične medicine povećan na 29.

Navedene aktivnosti u oblasti porodične medicine kao i nabavka neophodne medicinske opreme uz stalnu aktivnost na edukaciji kadrova stvaraju pretpostavke za pružanje kvalitetnih zdravstvenih usluga građanima općine Živinice.

U ovom izvještajnom periodu pojavile su se značajne poteškoće u funkcioniranju JZU „Narodna apoteka” Živinice. Iste su intenzivirane i prerasle u problem pred kraj 2010.godine. Negativan finansijski rezultat i nedostatak adekvatnog kadra za rukovodeće dužnosti kao i drugi ovdje nespomenuti problemi uzrokovali su otežano funkcionisanje navedene ustanove.

## ***XVI NEVLADINE ORGANIZACIJE, MLADI I UDRUŽENJA GRAĐANA***

Nevladine organizacije, mladi i udruženja građana predstavljaju značajan segment razvoja civilnog društva i demokratizacije cjelokupnih društvenih odnosa. Upravo zbog te činjenice općina Živinice je posvetila značajnu pažnju saradnji sa nevladinim sektorom.

U budžetu općine za 2010.godinu utvrđena su kao posebna stavka sredstva za nevladine organizacije i udruženja građana. Dodjela ovih sredstava vršila se putem javnog poziva za projekte i programe, a u skladu sa odlukom o kriterijima za dodjelu sredstava.

Nevladin sektor na području općine Živinice uopšteno uzevši nije razvijen. Postoje organizacije i udruženja koje su formirane ali u suštini nisu prešle granice općine kada se radi o apliciranju za novčana sredstva od donatora koji raspolažu navedenim sredstvima namjenjenim za podršku navedenom sektoru. Vrlo čest je slučaj da se organizacije i udruženja iz nevladinog sektora pojavljuju sa zahtjevima za dodjelu novčanih sredstava iz općinskog budžeta a da ne predlažu realizaciju projekata značajnih za zajednicu.

Naš stav je da budžet za ovaj sektor bude programski što podrazumjeva da se za dobijena sredstva moraju ispuniti određeni ciljevi. Do sada, u izvještajnom periodu za prethodnu godinu osim rijetkih izuzetaka to nije bio slučaj. Očekujemo da će se desiti promjene u funkcioniranju nevladinog sektora u narednom periodu.

## ***XVII JAVNOST I TRANSPARENTNOST RADA***

U prošloj godini, nastavljena je kontinuirana praksa informisanje građana o svim važnijim događajima, radu Općinskog vijeća, Kolegija općinskog vijeća i općinskog Načelnika i drugim pitanjima od značaja za građane. Takođe su općinski Načelnik i šefovi općinskih službi imali otvorene i kontakt emisije u određenim terminima tokom godine, gdje su javnost i naši građani informisani o

raznim aktivnostima, problemima, a odgovarali smo i na direktna pitanja građana. Na zahtjev grupa građana, interesnih zborova i mjesnih zajednica održavali smo sastanke na terenu i često rješavali probleme nakon neposrednog uvida u stanje na licu mjesta.

Bez obzira na ovakav ambijent, činjenica je da je odziv građana na ove vrste rasprava slab, što ukazuje da naši građani još uvijek nisu dovoljno zainteresovani da se aktivno uključe u odlučivanje o najvažnijim pitanjima društvenog značaja.

Za sve javne radove raspisivan je tender, a izbor najpovoljnijeg ponuđača vršen je isključivo komisijski i uz javno otvaranje ponuda.

Za sve nabavke energenata, računara i opreme, kancelarijskog materijala, čak i običnog papira, takođe je raspisivan tender, a izbor najpovoljnijeg ponuđača vršen po istom principu, potpuno u skladu sa Zakonom o javnim nabavkama.

Za sve ugovore i sporazume, koji se tiču bilo kakvih finansijskih sredstava, prethodno sam konsultovao općinskog pravobranioca.

Sve prodaje općinskog zemljišta, kao i druge općinske imovine vršio sam isključivo javnom licitacijom, a sva rješenja o dodjeli donijelo je isključivo općinsko vijeće.

Sve moje važnije odluke i rješenja objavljene su u “Službenom glasniku općine Živinice”.

Uspostavom Centra za pružanje usluga građanima po principu “sve na jednom mjestu” nastojali smo stalno održavati postignuti nivo povjerenja građana prema lokalnoj vlasti. Tako smo preduzeli niz mjera i aktivnosti u pravcu jačanja principa javnosti i transparentnosti od kojih ističemo: mogućnost SMS provjere statusa podneska, preuzimanje zahtjeva i vodiča iz oblasti upravnog rješavanja sa web stranice općine Živinice, uvođenje Info-pulta na kome građani vrlo brzo dobivaju sve potrebne informacije, kao i dostupnost Knjige utisaka i Knjige žalbi na rad uposlenika.

Načela javnosti i transparentnosti zaposlenici organa uprave poštuju u radu sa strankama a posebno se pridaje pažnja slobodnom pristupu informacijama. Svaki građanin može zahtjevati informacije od javnog značaja i u propisanoj proceduri, u skladu sa zakonskim i drugim propisima i aktima dobiti potrebne informacije. Smatramo da je u izvještajnom periodu učinjen znatan napor i u ovoj oblasti.

## **XVIII ZAKLJUČAK**

Protekla 2010. godina za općinu Živinice bila je godina u kojoj je nastavljen trend razvoja. Ostvarili smo zacrtane ciljeve i time upotpunili razvojnu viziju naše općine. To znači da se i dalje uspješno nosimo sa svim izazovima i teškoćama društva u tranziciji, sa obavezom da provodimo promjene i aktivno učestvujemo u započetim reformama.

Nastavili smo da jačamo organizacione, prostorne i informatičke kapacitete općine, kao neophodan uvjet za uspješno pružanje usluga našim građanima.

Poseban akcenat stavili smo na drugačiji odnos prema ljudskim resursima i upravljanju ljudskim resursima. Na tom planu smo postigli početne uspjehe i stvorili uvjete da općinska administracija u narednom periodu u potpunosti odgovori postavljenim zadacima i obavezama.

Nastojali smo da se u svim značajnijim pitanjima za općinu konsultujemo sa našim građanima putem javnih rasprava, informativnih i drugih zborova, kroz prijem stranaka, sastanke sa predsjednicima i članovima savjeta MZ-a, građevinskim odborima i na druge pogodne načine. Neizostavno je da pomenemo i podršku općinskog vijeća, kao predstavničkog tijela građana, koje je imalo svoju vrlo pozitivnu ulogu u navedenim procesima. Poštovali smo načela transparentnosti i javnosti, kako u procesu donošenja tako i u procesu implementacije odluka, programa i projekata. U tom cilju bili smo otvoreni za saradnju sa svim medijima i javnošću.

Realizirali smo veliki broj projekata, različitih vrijednosti, koji u suštini utiču da život naših građana bude kvalitetniji. Sa ograničenim budžetskim sredstvima, racionalno i ekonomično ih koristeći, saradjući sa općinskim vijećnicima i našim građanima, uspjeli smo realizirati vrlo vrijedne projekte koje sam općinski budžet ne bi mogao podnijeti. Radeći tako ispunili smo naša obećanja da ćemo se truditi da ujednačimo razvoj općine na svim njenim područjima i da život na selu približimo životu u gradskim uvjetima. Posebnu smo pažnju posvetili razvoju do sada manje razvijenih općinskih područja u koja smo ulaganja vršili u potpunom iznosu iz općinskog budžeta, čime smo osigurali mogućnost da se građani sa tih područja uključe sa svojim prijedlozima u rješavanju infrastrukturnih projekata.

Proces odabira projekata prošao je potrebnu proceduru, počevši od javnog poziva za kandidovanje projekata, preko izbora izvođača radova pa do okončanja samih poslova na konkretnoj izgradnji predmetnih objekata. Želimo napomenuti da je u tome ispoštovana zakonska procedura, općinski propisi, kao i Zakon o javnim nabavkama BiH.

Nastavili smo aktivnu politiku na polju prostornog planiranja, urbanizma i stambeno-komunalne oblasti. Takođe smo sistemski pristupali radovima na komunalnoj infrastrukturi i tokom cijele godine istu održavali u stanju za normalno funkcionisanje. Izgradnja kanizacionog kolektora za odvod otpadnih

voda predstavlja projekt kapitalne vrijednosti i vrlo značajnu osnovu za budući razvoj općine.

Boračka populacija je područje naše posebne brige bez obzira na ograničene mogućnosti i nadležnosti općine u toj oblasti. Naša pomoć nije izostala za one koji su je od nas tražili ili dobivali na našu inicijativu.

Raseljena lica na području naše općine još su prisutna, iako je prošlo toliko vremena od uspostavljanja mira i njihov povratak bio je realno moguć. Smatramo da nadležne vlasti na većim nivoima nisu obavile svoj posao i moralno nisu bile na visini zadatka koje su trebale obaviti. I dalje se trudimo biti dobri domaćini toj zaista vrlo ugroženoj populaciji stanovništva.

U oblasti privrede možemo reći da bilježimo trend rasta i da je prelazak sa “općine sa industrijom na zalasku” u poduzetničku i poljoprivrednu općinu sa dinamičnim razvojem uspješno izvršen. Ostaje nam obaveza da i dalje budemo na usluzi našim privrednim subjektima, gdje naši građani ostvaruju uslove za egzistenciju sebe, svojih porodica i općine u cjelini. Problem nezaposlenosti i dalje je jedan od najvećih problema na području općine.

Naše opredjeljenje za razvoj sektora poljoprivrede neupitno je i bićemo protiv bilo čijih nastojanja koja budu imala za cilj skretanje sa ovog razvojnog pravca.

Obrazovanje funkcionira po ustaljenom redu, značajnijih promjena u ovoj oblasti nema, ali se i dalje ispoljavaju poteškoće vezane za prostorne i materijalne uslove u kojima nije došlo do značajnijeg poboljšanja.

Zdravstvene usluge pružaju se putem Doma zdravlja i mreže ambulanti porodične medicine, a kako je ovaj projekat još uvijek u svom začetku, postoje problemi za koje očekujemo da ih nadležni organi riješe u narednom periodu. U narednom periodu bit će potrebno riješiti problem funkcionisanja JZU „Narodna apoteka“ Živinice.

Općina bilježi napredak na polju sporta što se posebno odnosi na kolektivne dvoranske sportove. Naša ulaganja u sport pored razvoja zdravih mladih ličnosti utiču i na smanjenje ovisnosti svih vrsta, u prvom redu narkomanije.

Nastaviću praksu da ovaj izvještaj umnožimo na najjeftiniji novinski papir i dostavimo u svaku kuću, svaki stan našim građanima, kako bi svojim primjedbama, prijedlozima i sugestijama doprinijeli kvalitetnijoj realizaciji programa rada načelnika za tekuću godinu, kao i ukupnom napretku demokratskih procesa u građanskom društvu.

**OPĆINSKI NAČELNIK**

*mr.sci.Hasan Muratović, s.r.*